

65 Jaor

Ze zègke: de ganse sjtad die waar bekans verlaote,
Hele families nao Friesland geëvacueerd,
De kathedraal opgeblaoze, hoezer kepot gesjaote
De sjtasie gebómbardeerd.
Geliek kwoom d'r weer nuuj gevaor:
Ze dachte de Russe die sjtaon al weer klaor.

Maar in 65 jaor is hie gin bómm meer is gevalle,
In 65 jaor haet hie gin mortier meer geknald.
Oorlog is nag lang neet veurbie.
Maar de letste 65 jaor waar d'r gelökkig neet hie.

Vandaag sjrief de gezet euver oorlog in Bagdad,
En morgen is de beurt aan weer 'n anger sjtad
En euvermorge gooit 'ne sjpiksplinternuje oorlog
Mit sjpiksplinter nuuj bómmen weer 'n nuuj ónsjöldige plaats plat.
Sóms bön ich bang,
Dan dink ich: 'Höbbe veur hie neet 'n bietje te väöl mazzel gehad,

Det in 65 jaor hie ginne houwitzer meer haet gesjaote,
Det in 65 jaor hie gin miene zin gelag?'
Oorlog is nag lang neet veurbie,
Maar de letste 65 jaor waar d'r gelökkig neet hie.

Ich haop det ós kienjer euver 35 jaor kinne zinge
Det in 100 jaor hie gin mitrailleurs meer höbbe gerateld,
Det in 100 jaor hie gin tanks meer höbbe gepatrouilleerd,
Det in 100 jaor hie gin razzia's meer zin gewaes,
Det ze dan zinge:
'Oorlog is noe euveral veurbie'.
Zing maar:
Oorlog is noe euveral veurbie,
Net wie 100 jaor geleje hie

65 jaor
65 jaor
65 jaor
Maar nog sjteeds neet klaor...